

曰敦復斐然進取而弗能守是曰頻復冥然
習俗甘謂不能以自賊是曰迷復諸士子之
請事于斯堂也其爲休爲獨爲敦爲頻爲迷
在敬擇之矣夫學宮之徙變爲黃冠羽服數
百年矣一旦而煥然章縫陶然弦歌以並于
上國乃反掌間耳學術之湮變而訓詁詞章
亦久矣一旦而崇正教敦實行仁其身以仁
天下將孰跋之而孰寔之顏何人也予何人
也幸無忝於斯堂

文會所記

何 御明知府

廉近有復初書院前守胡鹿厓先生因舊府
學爲之規制弘廡號宇聯絡諸學士講習有
地矣迺復爲北園文會所何也北園非爲文
會創也其地故林氏居之棄于龍源鄭氏鄭
氏病其窳下難居也乃致于官予得而取焉
方其初蕪穢不治莽然荆棘耳予漸次芟除
旣旬月遂爲勝地方塘脩竹丹荔黃柑一凝
眸可盡豈非地之顯晦亦有時耶於是爲門

爲堂爲堂爲室爲廚舍爲壇而甃之前左爲垣捷于城蓋予時一假憇焉非以會文也而昔所及門之士從予至者據經問疑退而各書所聞相與論辨充充然若真有得於予者遂曰此吾文會所也噫予豈能發子之文哉記曰藏焉修焉息焉游焉一張一弛古之道也諸學士能以予之所息游者而得其藏修之實則茲所可以不廢而人道紀綱師友淵源有真樂矣不然終日之聚亦鶯斯之類也

焉攸取

重修合浦縣記

胡濟世

明知縣

合浦自三代以來職方無聞焉秦時始謫中原民戍五嶺漢武始遣將下南粵樓船伏波會兵降之開九郡置合浦縣屬合浦郡其後孟太守廉明牧愛去珠復還人皆神之於是中州目其地爲還珠遺跡此以官聞其地也夫封域人心古今一也有官必有治詩曰君子攸躋言官與治偕也古而續廢而修此心

此理無弗同者余以癸丑夏承乏合浦時有
舊尹令子沈明經邸遇詢之曰邑疲民瘵且
附郡會凡百統尊罔克專遂卽如縣治敝久
莫修一經雨颶令爲張蓋蒞事他可知已余
聞之惻然然猶以顧其時其事何如耳比至
棟適新隆制猶未備蓋前尹楊君文曄申請
改建太府監川何公實主張是焉無何楊以
覲行代署者郵易經稔弗竟余來命工畢修
制中爲堂東爲什物房西爲庫房堂後爲知

縣廨堂東爲贊政廳東下爲丞廨西主簿

裁今

爲戒石亭兩翼爲六房前爲儀門門東爲土

地祠爲典史廨西爲獄又前爲大門繚以周

垣易腐以堅補缺爲完規制蔚然改觀矣事

竣與同寅丞金君魚曰豈惟治哉太上修官

次修風次修治故治也者以宣山川之風以

耀德於廣遠也風德以廣之風山川以遠之

風物以聽之風禮樂刑政以出之風太極兩

儀五行以法之故曰君子德風今之日邑之

風蠱矣易曰蠱元亨而天下治終則有治天
行也要所以治者曰先甲三日後甲三日吾
同寅協恭和衷辛丁其問或以幹而得中或
以幹而用譽風移俗媾與治俱新而民用安
堵奚啻一櫟一瓦之庇已耶后之視今猶今
視昔將必有采風直筆紀循良傳以大開遺
跡視孟君之治尤弘拓之矣嗣茲而躋者尚
思其所以哉于是乎記

合浦縣建學記

秦金

明尚書

東廣列郡爲十獨廉處僻海隅與交趾接壤
漸染彝風士鮮學問知禮義科第亦寥寥無
聞嘉靖乙未秋八月淨峯張公奉命來守茲
土銳興文教郡學舊建城之東北合浦縣學
附建在其旁地位墊涇堂殿傾圯號舍鞠爲
茂草官師子弟殊弗堪公瞻視之餘咨嗟嘆
息聿興遷徙之念踰年政通人和乃得善地
於城南移文所轄各大司爲遷學之舉勞費
皆獨任不需公帑遂於丙申十月之吉表正

方位經材庀工首建公廨二區俾師教者得
以棲息次明倫堂又次兩齋高明軒朗視舊
倍蓰矣大殿兩廡儀門及櫺星門非巨木無
以勝任乃祭告山川之神動衆伐木於大廉
山中桴載海運厥惟艱哉十二月癸巳日夜
颶風大作黎明海忽漂木百六十餘株河澣
人皆驚駭月餘忽漂巨木六十株至大小皆
可勝任廉之士夫耆老僉云自洪武永樂迄
于今百七十餘年未嘗見此奇異我侯至誠

格天天相其成又云廉去潮不遠昔唐韓昌
黎守潮之日能開衡嶽之雲馴鱷魚之暴我
侯今日之遇適與相符孰謂今人無古人耶
公謙讓弗遑諭衆曰漂木之來偶然耳吾何
修而敢謂格天何功而敢望昌黎哉識者皆
服其謙德雅量中孚一感可及豚魚雖匹夫
匹婦之賤皆樂事勸工惟恐或後不數月而
厥工就緒宮室以間計者四十有二垣墉以
丈計者一百五十有二前鑿泮池深廣得宜